

ծրագրին և տեղւոյն տրամադրութեան պահանջմանց համաձայն :

Վերջին նկատողութիւն մըն ալ, սեղանին ձախը, կողակին կողմը, կայ նեղ դուռ մը, որուն սեմը հողէն վեր է 30 սանթրիմէթր և կը տանի քառակուսի, բայց անկանոն սենեակ մը, գրեթէ երկու մէթրնոց : Ամբողջ վարի մասը փորուած է ժայռին մէջ, 1-2 մէթր բարձրութեամբ : Այս սենեակը միակն է իր սակին մէջ. եւ ո՛րեւէ եկեղեցիի մէջ, նման շինուածքի մը չենք հանդիպիր : Ինչո՞ւ համար այս փոքրիկ սենեակը խնամքով մը կապուած է կողակին հետ : Արդեօք Զաքարիայի տաճն կը վերարբերի. և այս սենեակը՝ իր ժայռոտ մասովն արդեօք եղիսաբեթի հինգ ամսուան տուանձնութեան քնակարա՞նն էր. ուրիշ ի՞նչ յիշատակ կրնար ներկայացնել ա՛յն քրիստոնէից, որ կառուցին այս եկեղեցին : Անօգուտ պիտի ըլլար՝ այս մասին կարծիք մը յայտնել, վասն զի ուղեգիրները ծանօթագրութիւն մը չեն հաղորդած մեզ » : (Տե՛ս « La Patrie de Saint Jean Baptiste », էջ 172-175) :

6. Այնքեարիմի հայոց վանքին ու եկեղեցւոյն ազգ. յիշատակարանները .

Այնքեարիմի Ս. Կարապետի վանքին հիմնարկութեան ծագման մասին պատմութիւնը արձանագրութիւն մը չունի, միայն Անաստաս հայ վարդապետը՝ իր Ս. Տեղեաց ցուցակին մէջ, « Մամիկոնեանց վանքն որ յանուն Ս. Կարապետին » խորագրով կը յիշէ երկու վանքեր, մին՝ քաղաքէն դուրս, որ « Լեռնակղման » Հայոց վանքն է, միւսը՝ Սիօնի մէջ : Մամիկոնեանք՝ քանի որ Տարօնոյ Ս. Կարապետ վանքին հովանաւորը եղած են, անտարակոյս պիտի փափաքէին Ս. Կարապետի ծննդավայրին՝ Այնքեարիմի մէջ, կառուցանել իշխանավայել յիշատակարան մը : Հայք՝ մինչև Խաչակրաց ժամանակ, Մամիկոնեանց սոյն վանքին խաղաղ կերպով տիրացած էին և ո՛չ ոք զիրենք անհանգիստ կ'ընէր : Սալահէտտինի Երուսաղէմի գրաւումէն յետոյ է որ նոյն տեղւոյն վրայ կը ծագին սեպհականութեան խնդիրներ : Սալահէտտին՝ Պաղեստինի չրջակաները, իրեն հետ պատերազմող յաղթականներուն չնորձած էր հողեր, որոնց մէջ կը գտնուէին վանքեր և եկեղեցիներ : Սալահէտտին հողային այդ « պարզե-